



**Služba za civilnu zaštitu**

Broj: 08-40-3-3476-2/24

Datum: 26.07.2024. godine

**Predmet: Obavijest o pojavi bruceloze na području  
općine Busovača – dostavlja se;**

Prateći trenutnu situaciju na području općine Busovača kada su u pitanju zarazne bolesti bruceloze kod životinja, a na osnovu informacija dobivenih od strane inspektora veterinarske inspekcije Ministarstva poljoprivrede, vodoprivrede i šumarstva, utvrđena je zaraza na brucelozu kod jedne (1) ovce na području općine Busovača. Što se tiče epidemiološke situacije na području općine Busovača, nema evidentiranih pozitivnih lica na ovu bolest.

Izvor zaraze bruceloze su životinje. Ljudi se mogu zaraziti direktnim kontaktom sa oboljelom životinjom, njenim izlučevinama ili konzumacijom mlijeka, mliječnih proizvoda i sirovog mesa zaraženih životinja. Poseban problem predstavljaju životinje koje nisu pod veterinarskom kontrolom, odnosno one životinje koje vlasnici istih nisu uveli u sistem kroz evidentiranje u nadležnoj veterinarskoj ustanovi (neredovne provjere, vakcinacije, prijevoz, kupovina i prodaja životinja bez kontrole, bez obilježja i slično), i Agenciji za označavanje životinja pri Uredu za veterinarstvo BiH.

Ljudi se zaraze na tri načina; ukoliko jedu ili piju nešto što je zaraženo brucellom, udisanjem organizma (inhalacijom) ili ulaskom bakterija u tijelo kroz površinske rane.

Najčešći način zaraze je ukoliko se jedu ili piju zaraženi mliječni proizvodi.

Zato je u uzgoju životinja potrebno provoditi stroge veterinarsko-sanitarne mjere kao što su:

- dobra higijena i redovna dezinfekcija,
- obavezno uvesti životinje u sistem registriranja i evidentiranja,
- redovno pratiti i kontrolisati životinje te strogo pridržavati se mjera pri sumnji ili pojavi bruceloze kod životinja.

U slučaju da ipak dođe do zaraze brucelozom, treba znati da ona nije neizlječiva bolest, ali su potrebne dugotrajne terapije jer je bruceloza sklona ponovnim javljanjem, zbog čega treba imati na umu sljedeće:

- uklanjanje izvora zaraze, odnosno iskorjenjivanje bolesti u životinja je osnova prevencije bruceloze kod ljudi,
- kuhanjem i pasterizacijom mlijeka te termičkom obradom mesa prekidaju se putevi zaraze čovjeka preko hrane,
- osobe koje rukuju životinjama ili truplima za koje se sumnja da su zaražena, trebaju nositi zaštitne naočale i gumene rukavice i trebaju zaštititi ozlijeđenu kožu od izlaganja,
- na području gdje je bolest enzootična (karakteristična za područje), provodi se imunizacija životinja – dosljedno cijepljenje životinja ima dobar učinak.

Zbog evidentne pojave oboljelih životinja od bruceloze, Općina Busovača apelira na vlasnike životinja da se registriraju, tj. da kao vlasnici svojih grla životinje uvedu u sistem evidencije kod nadležne veterinarske stanice. Navedenim činom postižu se višestruki pozitivni efekti, a najvažniji su svakako:


- blagovremeno i preventivno djelovanje u sprečavanju nastanka eventualnih zaraznih bolesti kod životinja čime se sprečava njihov prijenos na ljude, ali istovremeno i
- ostvarivanje prava vlasnika životinja za svako naredno pregledavanje, vakcinisanje i liječenje, koje se u tom slučaju provodi o trošku federalnih razina vlasti i nadležnih za monitoring i spriječavanje širenja zaraznih bolesti, kako kod životinja tako i za ljude, ali i naknada štete u slučajevima uginuća životinja koje su uvedene u sistem.

Općina Busovača će u saradnji sa Veterinarskom stanicom Busovača i JU Dom zdravlja Busovača pratiti stanje na području općine Busovača, kada je navedena bolest u pitanju, ali i kada je u pitanju uvođenje svih životinja u sistem veterinarske kontrole, te iste podržati u okviru svojih mogućnosti, a sve sa ciljem prevencije navedene bolesti na našim prostorima.

Istovremeno, svako neodgovorno ponašanje vlasnika životinja koje će zbog izbjegavanja obveze uvođenja u sistem veterinarske kontrole izazvati nastanak ili širenje bruceloze biti će adekvatno sankcionirano od strane nadležnog kantonalnog veterinarskog inspektora.

Budimo odgovorni prema životinjama i svom zdravlju!

S poštovanjem.



Služba za civilnu zaštitu  
POMOĆNIK OPĆINSKOG NAČELNIKA

mr. Nevenko Gavranović dipl. ing.